

**Tentamen medicum inaugurale de tetano ... / Eruditorum examini subjicit
Joannes Muir ... Antiguensis.**

Contributors

Muir, John.
University of Glasgow.

Publication/Creation

Glasgae : In aedibus Academicis, excudebat Andreas Foulis, Academiae
typographus; Edinburgi : Apud Mundell et filium, 1790.

Persistent URL

<https://wellcomecollection.org/works/x3q7pb37>

License and attribution

This work has been identified as being free of known restrictions under
copyright law, including all related and neighbouring rights and is being made
available under the Creative Commons, Public Domain Mark.

You can copy, modify, distribute and perform the work, even for commercial
purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

TENTAMEN MEDICUM

INAUGURALE

DE TETANO.

LENTAMEN MEDICUM

INAGURALE

DE THIANO

TENTAMEN MEDICUM

INAUGURALE

DE TETANO.

QUOD,

ANNUENTE SUMMO NUMINE,

EX AUCTORITATE DIGNISSIMI VICE-CANCELLARII,

ARCHIBALDI DAVIDSON, S. S. T. P. P.

ET COLLEGI GLASG. PRAEFECTI;

NEC NON

AMPLISSIMI SENATUS ACADEMICI CONSENSU,

ET NOBILISSIMAE FACULTATIS MEDICAE DECRETO;

PRO GRADU DOCTORIS,

SUMMISQUE IN MEDICINA HONORIBUS ET PRIVILEGIIS

RITE AC LEGITIME CONSEQUENDIS;

IN COMITIIS

UNIVERSITATIS GLASGUENSIS,

ERUDITORUM EXAMINI SUBJICIT

JOANNES MUIR, A. M.

ANTIGUENSIS,

SOCIET. AMERICAN. EDIN.

SOC. EXTRAOR. NECNON PRAESES ANN.

"Et praeteriti doloris memoria, recens est; et futuri, atque impendentis, torquet timor."

CIC. de FIN. BON. et MAL. Lib. ii. Cap. xxix.

Ad diem xvi. Aprilis, hora locoque solitis.

EX ED. QUAM

GLASGUAЕ:

IN AEDIBUS ACADEMICIS,

EXCUDEBAT ANDREAS FOULIS,

ACADEMIAE TYPOGRAPHUS.

APUD MUNDELL ET FILIUM, EDINBURGI.

M.DCC.XC.



VIRO,

majoribus genere certè nobilibus ;
sed maxima semper patriae caritate,
intemerata fide, et summa vitae integritate,
multò adhuc certissimè nobilioribus :

Quorum ille olim GILBERTUS,
nobilitate certè, non verò virtute, familiae tertius ;
cui inerat virtus

ingenita, nec pecunia expugnabilis nec minis ^a :

Quique, fidem et hosti datam fallere nescius ;
majore parte caeterorum,
quos eadem, quae ipsum, res attingebat,
fidem salute viliorum turpissimè ducente,

“ Generosiùs

“ Perire quaerens ;”

et plurimis, et sacerdotum quidem ordini,
prava monentibus, toto pectore viriliter dissentiens ;
obstantes propinquos familiaresque,

et optimum quemque civem reditus morantem,

SCOTUS REGULUS, dimovit :

Et, etiam si sciret, quae hostilis sibi rex pararet,
tamen, millibus incassum reclamantibus,

L O N D I N I U M,

quò, in custodiam redeundo, pactam liberaret fidem,
egregius properavit exul ^b :

Nato :—

DAVIDI KENNEDO ;

decimo CASSILISSAE Comiti ;

Vicecomiti KENNEDO ;

hereditario CARICTAE Praefecto ;

gentis KENNEDORUM Principi ;

ex sexdecim SCOTORUM Procerum legatis,

in BRITANNICO Senatu, uni :

Qui,

literis imbutus humanioribus scientiisque,
et omnibus bonis artibus ingenuisque ornatus ;
justitia, beneficentia, illibata integritate fideque,
constantia, misericordia, animo ad servandam patriae
libertatem pertinace, hominum ubique generis caritate,
nobilitatem a majoribus acceptam,
auctiorem reddidit et ampliorem ;

hocce inaugurale opusculum

summa observantia

consecratum voluit

JOANNES MUIR.

^a Vid. BUCHAN. RER. SCOTICAR. HIST. Lib. XV, Cap. VII.

^b *Ibid.*

Me ingrati quidem animi et beneficiorum immemoris manifestum boni omnes haberent, si, summos medicinae consecuturus honores, quosdam probatissima viros virtute probitateque, atque optimè de me merentes, silentio hìc praeterirem.

Tibi itaque imprimis, GULIELME CLERICE LONDINIENSIS, navis mercatoriae, JACOBI et REBECCAE, cognominatae, merces ultro quotannis citroque, inter LONDINIUM et ANTIGUAM, vehentis praefecte; qui, opportunissima tua benignitate, mihi navi SCOTIAM proficisci desideranti, ut summos medicinae honores ritè ibi legitimèque consequerer, unde impensas peregrè erogarem, mihi meo nomine, nemine tibi pro me intercedente, fidens, uberè supeditavisti; gratias debitas ago. Quotannis, itaque,

———“ DIVA potens CYPRI,

———“ FRATRES HELENÆ, lucida sidera,”

et IAPYX, aliis omnibus ventis obstrictis, te finibus BRITANNICIS,

“ THYNA merce beatum,”

reddant incolumem, precor, et animae dimidium meae fervent.

Tibi quoque, ROBERTE KENNEDÉ de DALJARROCO armiger, MAGNAE BRITANNIAE copiarum Centurio, patris mei consobrine, me beneficiis quàm plurimis a te acceptis obligari obstringique, libentissimè animoque quàm gratissimo confiteor.

Neque te, DAVID TENNANTE, qui, octo propè annos, per quos apud te AERAE, SCOTIAE oppidi, puerulus diversabar, curis quasi paternis, assiduam GRAECIS me linguis LATINISQUE instituendo, et virtute bonisque teneram aetatem artibus informando, curam impendisti; atque, in omni re, mihi veri ferè patris vice functus es; in hocce opusculo, quamvis brevè perituro, oblivisci possum. Si a recto aberrabo, prorsus meum erit; Si placebo, erit omnino ferè tuum.

Vobis omnia, amici, quae vultis bona, voveo; ut

“ Gratia, fama, valetudo, contingat abunde,

“ Et mundus victus, non deficiente crumena;”

utque DII vobis dent artem his divitiis fruendi.

Vivete et Valet.

TENTAMEN MEDICUM

INAUGURALE

DE TETANO.

Ex innumeris ferè morbis, quibus Natura hominum genus obnoxium finxit, pauci sunt magis extimescendi, quàm is, de quo breviter differere proposui; quemque celeberrimus CULLENUS, in sua morborum Digestione, esse “Plurium muscutorum rigiditatem spasticam,” breviter definivit.

In hunc morbum, qui, calidas regiones et solis ardore exustas, utraque potissimùm INDIAS, incolunt, ii incidunt pròpioribus, quàm qui, in locis, sive temperatis, sive polos utrinque propioribus, habitant: Veruntamen homines, ubicunque degant terrarum, eo interdum afficiantur, pereantque. Qui morbos digerunt, ii, hunc in complures species, in *Tetanus* scilicet, *Opisthotonus*, *Emprosthotonus*,

dispertiverunt ; et CULLENUS, Trismus, ut genus morbi a *Tetano* diversum, disposuit. Verùm praeclarus is auctor censet, inutilem ferè esse talem dispositionem, et nomina modò dicta, non tam diversos morbos, quàm diversos ejusdem gradus, denotare.

Morbum, de quo hìc disputatur, adesse, ferè certè indicat sensus, circa collum gutturque, rigiditatis ; quae adeo paulatim intenditur, ut caput non, sine difficultate, et quidem dolore, moveri possit. Organa quoque, quae loquelaè inserviunt, aegriùs suo munere funguntur ; et linguae radix adeo est constricta, ut glutire pedetentim fiat difficile, et tandem id fieri omnino non possit. Haud ita multò pòst, dolor, saepe gravis, sentitur permanare secundum dorsum ; cujus musculi, unà cum iis cervicis, statim ita spasmis afficiuntur, ut caput retro flectant. Musculos, inferiorem qui attollunt maxillam, quique, morbo invadente, fuerunt quadantenus spasticarigiditate affecti, vehementiores nunc spasmis corripunt. Musculi maxillares rigescunt, ideoque dentes adeo arctè comprimuntur, ut cibo, per os, in ventriculum aditus prorsus ferè nullus pateat ; et, eam ob rem, aegrotus, tantum assumere alimentum, quantum, ad vitam sustentandam, sufficiat, vix,

et saepe ne vix quidem, possit. Signa haëtenus memorata, ea sunt, quae hic morbus exhibet, cùm, a puncto nervo incipiens, vehementer ingravescit; et *Trismus* ab auctõribus appellatur.

Cùm morbus eò processit gravitatis, dolor, ab infima sterni parte, cui nomini est Cartilago Eniformis, sese ad dorsum ferè semper diffundit. Statim, post hoc, musculi totius cervicis spinaeque, sese vehementer contrahentes, corpus retrorsùm validè retorquent. Huic morbi formae nomen, *Opisthotonos*, fuit ab auctõribus inditum.

Cùm verò musculi, quorum contractione corpus antorsùm curvatur, spasmis afficiuntur, morbum, *Emprostotonon*, medici appellant.

Pleurosthotonos autem, seu *Tetanus Lateralis*, morbus nominatur, cùm, quod rarò accidit, corpus, musculis lateralibus spasmo affectis, dextrorsùm sinistrorsùmve deflectitur.

Si morbus subito invadit: Si extremum ubique corpus, praesertim manus et pedes, inalgescunt: Si, his signis antecedentibus, extremae inferiorum partes membrorum spasticis afficiuntur contractionibus; quae, brevì, abdominis quoque musculos septique transversì afficiunt; adeo ut alvus validè retro trahatur, et, eam duram, ut tabulam, contrec-

tans sentiat : Si crura, musculis, et qui ea flectunt et qui extendunt, unà et contrà agentibus, quàm possunt maximè extenduntur : Si, aegroto sese quantumcunque movere tentante, totius musculi corporis adeo spastica contractione afficiuntur ; ut, actionibus musculorum, et qui caput flectunt truncumque, et qui haec extendunt, inter se aequalibus sed contrariis, corpus, in rectum, porrigatur, rigidum extendatur, et omnigeni motus prorsus maneat impatiens et incapax :—Tum morbus is est, cui nomen, *Tetanus* strictiùs dictum, medici indiderunt.

Cùm morbus hùc processit gravitatis, brachia, haud multùm antea affecta, vehementer nunc extenduntur ; propterea quòd omnes eorum proprii musculi, praeter eos digitorum qui, usque ad mortem, mobiles saepe manent, spasmò afficiuntur.

Lingua quoque mobilis aliquandiu ferè perstat ; sed tandem, ejus quoque musculos, eos praesertim qui ore eam exerunt, spasmò corripunt. Quam ob rem partim ore protrusa, adeo inter dentes comprimitur, ut foedissimè hi eam incidant et lacerent. Morbo implicitus nunc, motum quidem minimum tentare timet ; quòd scit, conamen levissimum certò effecturum, ut redeat spasmus. Ob musculos maxillarum quoque et labiorum vehementer con-

strictos, minùs, quàm antea, articulatim et distinctè loqui potest.

Eodem tempore externus corrugatur nasus, sursumque, frontem versus, trahitur; atque nares horrendùm dilatantur. Os est horrificè distortum, et nunc pallido est, nunc florido colore. Oculi interdum frontem versus attrahuntur, interdum nasum versus; et, efferati, in eodem obtutu haerent. Somnus, siquando laborantem gratissimus occupet, faepissimè, spasms redintegratis, subitò divellitur, ideoque vires parùm reficit aut recreat. Frons sursum in rugas contrahitur; et buccae retro, aures versus, velluntur. Spuma pallida, interdum sanguinea, ore emanat; atque totus vultus, signa gravissimis afflictì doloribus ostendit.

Spasmi autem non sunt constantes; nam postquam, per sexagesimam horae partem vel trigesimam, persisterunt, tum partim, et ad tempus, solvuntur. Sed quàm breve et fugax est laborantis solatium! Plerumque enim, sexta ferè horae parte vel quarta elapsa, suum impetum redintegrant; et miserando aegroto intolerandos ferè cruciatus, et, nisi iis qui viderint, incredibiles, secum afferunt.

Aeger, quoties, spasms relaxantibus, obdormiscit, delirio vexatur; sed, utrùm hoc ex natura

morbi nascatur, an e remediis adhibitis, discernere non possumus ; quod idem, de alvi duritia, quae hunc morbum semper comitatur, dicere liceat.

Appetitus cibi plerumque parùm minuitur ; et, per totum ferè morbi decursum, quicquid alimenti assumitur, id ventriculus benè concoquit. Sitis interdum est modica, interdum vehemens ; atque, inter spasmodum intentionem, et aliquandiu quidem postquam, ad tempus, remiserunt, aeger semper, ex difficili crebroque, spirat.

Tetanium, si ab laeso nervo inceperit, febris rarò comitatur ; sed, si a frigore, interdum. Cùm vehementes spasmi, universos corporis musculos unà corripunt ; pulsus tum arteriarum parvi fiunt, crebri, et abnormes ; verùm, donec morbus ad finem appropinquaverit, parùm solito debiliores.

Organa, quae fecernunt urinam excernuntque, variè hoc morbo afficiuntur : interdum enim urina ex toto retinetur ; interdum, aegroto quidem insciente, effluit.

Maculae, uti vocantur, *Miliariae*, ferè, totum per corpus, efflorescunt. Fine morbi appropinquante, ungues, et extremi et manuum et pedum digiti, lividi evadunt : atque frigidus lentusque

fudor, extremas et inferiorum partes humectat et superiorum.

Spasmi, qui, initio morbi, neque vehementes erant neque diutini, nunc evadunt et diuturniores vehementioresque; dum miserandus aeger, gravissimis cruciatibus confectus, tandem, musculis totius corporis unà convulsis, acerrimis moriens aerumnis liberetur.

Etiam si nulla sit aetas vel sexus, quin Tetano interdum afficiatur, tamen hic morbus, mares saepius, quàm foeminas, invadit; qui media sunt aetate, quàm qui nondum maturuerunt, vel jam senescunt; plenos robustosque, quàm quibus contrarius est corporis habitus.

Species Tetani est vel Trismi, cui infantes, quàm quibus firmior est aetas, magis sunt obnoxii; cuique, eam ob rem, nomen, Trismum Nascentium, auctores indiderunt. Sed cùm CULLENUS, cui, hac in re, accedo, Trismum Nascentium, et species suprà dictas, cum Tetano genere concinere, et magnitudine tantùm et gradibus discrepare, rectissimè censuerit; ideo, hac in dissertatione, haec omnia, non pro diversis morbis, sed pro diversis ejusdem gradibus, habebo.

Trismus nascentium aequè, ac caeterae Tetani species, incolas calidarum regionum potissimùm infestat: verùm interdum tamen, aquilonales quoque regiones EUROPAE incolentibus sese infestum ostendit. In infantes enim GALLORUM nonnunquam ingruit; per saepe in eos HELVETIORUM. Fert quoque CULLENUS, se certiore fuisse factum, hunc morbum interdum, infantes, apud MONTICOLAS CALEDONIOS, corripuisse; sed, eodem tempore, se, ne unum quidem hujus exemplum, apud CAMPESTRES, unquam vidisse, profitetur.

Tetanus interdum adeo celeriter ingravescit, ut, paucis horis, aegrotum perimat; saepius autem procedit lentius, seriùsque summam ejus horrendamque saevitiam attingit. Hic loci, haud alienum videtur, observare, spasmos, in nonnullis hujus morbi exemplis, primò inferiorum extremas membrorum partes corripuisse; dein, paulatim sursum repentes, affecisse musculos abdominis, eosque quorum ope superiora corporis membra moventur^a. Haec ingruendi ratio, prorsus ei est dissimilis, quam hicce morbus plerumque sequitur, quamque plerique tradiderunt auctores. Ferè enim

^a Vid. GIRDLESTON's Treatise on the Spasmodic affections in INDIA.

perhibent, Tetano ingruente, spasmos primò musculos maxillae inferioris proprios corripere, dein, per musculos colli truncique, permanare.

Sanguis, urgente hoc morbo, missus, pelliculam, inflammationis indicem, induere non observatur: Neque, ut naturaliter oportet, frigore con-
crescit; quod forsan eo efficiatur, quòd particulae, ex quibus constat, minùs, inter se, firmè cohaerescant.

BONTIUS perhibet, cadavere unius hoc morbo mortui inciso, se, glutinosam foetidamque materiam, in cerebri ventriculis, conspexisse. MORGANIUS quoque, accuratissimus quidem rerum observator, se, sectis cadaveribus quorundam, quos hic morbus abstulerat, fluida in cranium, praeter naturam, effusa vidisse, narrat. Sed, utrùm res unquam ita sese habeat, inter recentiores auctores minimè convenit. Horum enim animi magis, ut videtur, inclinant, ut arbitrentur; neque partes in cranio contentas, neque eas fitas alibi corporis, ullam abs Tetano accipere injuriam, quae percipi potest.

CAUSAE REMOTAE.

Harum duo sunt genera: Quorum

Primum, Omnia, quae corpus vel directè debilitant vel indirectè, in se complectitur; et

Secundum, Omnia, quae nervos vel laedunt, vel, praeter modum, irritant.

GENUS PRIMUM.

Rerum, quae Tetanum, vires corporis labefacundo, inducunt, nil, quàm frigus corpori inexercitato admotum, praesertim si humectum vel madefactum hoc fuerit, plus potest. Quantum, ad hunc morbum excitandum, polleat causa modò dicta, exemplum, de quo vir * ingeniosus et mihi familiaris, nuper ANTIGUA redux, me certiore benignè fecit, satis monstrabit.

Adolescens sexdecim ferè annos natus, et corporis habitu robusto plenoque; postquam, sub aestuante sole, quem perpeti se parùm assuefecerat, totum ferè diem, equitaverat; equo in stagnum iniquo

* JACOBUS ANDERSON, EDINENSIS.

quodam casu dejectus est, et penitus madefactus ; sed, excepto levissimo, super alterum oculorum, vulnere, quod nullo eum malo afficere potuit, caetera omnino incolumis. Uvida exuendi vestimenta occasio, non, ante quartam horae partem elapsam, sese obtulit ; et, interea loci, madidus fuit libero aëris cursui objectus. De nihilo tamen, ea nocte, neque per dies duos proximè sequentes, querebatur. Tandem verò, tertio post die quàm fuerat madefactus, signa invadentis Tetani inauspicatò sese obtulerunt. Expertissimi undique circum medici, laboranti succurrere certatim conati sunt ; sed mors, lethiferis circumdata armis, locoque decedere nolens, medicina nil contra eam valente, septimum post diem, quàm primum fecerat impetum, incruentam tulit victoriam, et miserandum aegrotum, praedam, rapuit.

In funesto hoc exemplo, frigus corpori madefacto admotum, majorem ei, vires infirmando, debilitatem induxisse, quàm cui usitata exercitatio potuisset stimulando resistere, videtur ; eamque ob rem, vehementissimum effecisse morbum, qui, medicamentis omnibus debellatis, mortem attulerit.

Qui, calidas regiones vel aestuosas, utraque velut *INDIAS*, incolunt, ii diurnis laboribus peractis

lassati, fervidisque solis ictibus relaxati, optatum captare frigus ardent: Ideoque, simul ac sol sese oceano tinxerit, corpora multo sudore adhuc suffusi, lenes vesperè auras, sub dio, inhalatum prodeunt: Unde, grato, in praesens, frigore, sed malorum, in posterum, semina ferente, capti; atque improvidi securique futuri periculi; non testæ, donec rorescant, subeunt. Eorum corpora, hoc modo debilitata, saepe in Tetanum prona incidunt; et, quòd vespertinis auris semetipsos, a roratione immunitos, objecissent, eos nimis serò poenitet pigetque.

Humido quidem aëri, quò perniciosos suos effectus minùs praestet, corpus modicè exercitando obstarì potest. Sed vitam, in INDIA OCCIDENTALI, degentibus, somnum, vento interim per cubiculum flante, inire et quidem capere, nimis frequentem esse morem, propria experientia novimus. Quin hoc sit foetum periculis, nemini in dubio esse potest; cùm praesertim corpus humanum, multò, inter dormiendum, quàm inter vigilandum, faciliùs, frigore, caeterisque vires infirmantibus afficiatur. Rem discrimine ita esse plenam, nimis ex eo apparet; quòd, homines somnum, auris per cubiculum interim susurrantibus, capientes, subito expergisci,

vehementissimis febris horroribus, nervorumque distentionibus, quae ipsi saepe vidimus, laborantes, haud rarò accidit.

Larga aquae quoque copia, ab iis in ventriculum assumpta, qui somnum, poti, inierant, periculosum Tetanum saepe excitat. Dirum rei hujus exemplum Doctor GIRDLESTON, apud BRITANNICOS milites, stipendia, in INDIA ORIENTALI, facientes, conspiciatus est.

Ad idem genus pertinent exinanitiones nimiae, praesertim profluvia sanguinis; vehementes animi motus; et VENUS nimis studiosè culta.

GENUS SECUNDUM.

Hujus generis sunt vulnera nervis admota: Res omnes intestina nimis irritantes, vermes veluti, et venena; quibus accedat meconium infantum, quod eam morbi speciem, quae Trismus appellatur Nascensium, interdum inducit.

CAUSA PROXIMA.

Rerum, quae impediunt progressionem Medicinae aut certè tardant, profectò quidem proximas morborum causas investigandi difficultas, est, inter maximas, habenda. Quatenus praesertim Tetani proxima sit causa, cognoscere, ne perspicax quidem mens CULLENI potuit: Quocirca ingeniosus is auctor et eruditus, nihil, quàm incerta aut falsa, dicere meliùs ratus, rem, suapte natura adeo abditam et reconditam, in medio reliquit. Doctor quidem CHALMERUS opinionem, hac de re, excogitavit; quae, quantumcunque ex acumine oleat, speciosa potiùs, quàm vera, esse videtur. Censet is auctor, proximam Tetani causam, fluxum nervosi esse fluidi in musculos, quàm naturaliter oportet, uberiores. Nobis autem cum illo, hac de re, minimè convenit; cum praesertim, et quale sit id fluidum, et quo modo in corpus agat, id, peritissimos inter medicos, adhuc ambigatur.

Nobis videtur, fluidum nervis proprium tali esse genere et natura, ut, ex eo, velut fonte, omnium corporis functionum vigor potissimùm derivetur.

Id itaque fluidum nisi, Tetano invasuro, sit solito uberius ; quod, ex urgente debilitate, existimari vix potest ; copia, ad morbum tam gravem efficiendum, necessaria, quam in musculos influere opus esset, adeo, eam quantitatem, quae, ad vigorem ceterarum corporis partium sustentandum, est necessaria, minueret ; ut functiones et animales, ut vocantur, naturalesque, summas inde mutationes necessario subirent. Nil autem videtur rationis, cur, has tantillam quidem subire mutationem, credamus ; cum, morbo percurrente, aegrotus et praeterita rite reminiscatur, et in ventriculum assumpta bene concoquat.

Rem itaque, quam adeo recondidit natura, in medio relinquere, quam aliquid, de ea, parum adhuc exploratè compertum dicere, rectae magis consentaneum esse rationi censemus ; eoque magis, quòd nobis persuasum est, proximas omnes Tetani causas, quas in medium attulerunt auctores, adeo esse conjecturales, ut, veraene sint, necne verae, id nemini adhuc innotuerit.

D I A G N O S I S.

Indicia Tetani, quae suprà enarravimus, adeo ei sunt propria, et, tam pauca sibi, cum iis aliorum morborum, communia habent; ut, eum aliis omnibus morbis dignoscere, unus medicorum quisque quàm facillimè possit. Incipiens quidem, pro spastica colli rigiditate, habeatur: Sed, cùm spasmus, Tetano urgente, brevè increscant, dum, Rigiditate colli praesente, subsistunt; hi morbi, haud multò post primùm invaserint, facillimè, unus ab altero, internosci possint.

Mulieres quoque Hysteria laborantes, signa, haud multùm iis Tetani abfimilia, ostendunt. In eo enim morbo, ut in hoc, musculi maxillae inferioris, trunci, et corporis extremitatum, spasmis afficiuntur. Inter hos autem morbos hoc planè interest, quòd, illo urgente, corpus, parvo temporis spatio, vehementibus convulsionibus variè agitur; dum, urgente hoc, corpus plerumque, quasi frigore gelatum, rigidum et inflexibile manet. His signis, tam inter se disparibus, aliis-

que, quae longum esset hîc memorare, hi morbi facillimè distingui possunt.

Quaedam etiam sunt notae, quibus Tetanus et Catalepsis internoscantur. Hi enim morbi eo differunt, quòd membra Tetano affectorum interdum convelluntur, interdum adeo rigent, ut flecti non possint; dum ea Catalepsi implicatorum, non convulsa, flexibilia manent, et, quocunque situ ponantur, eum, nullo extrinsecùs ea movente, retinent.

Signis, quibus indicetur Hydrophobia, cum iis Tetani incipientis, magna interdum est similitudo. Hydrophobis enim muscoli, ad glutendum natura aptati, spasmis afficiuntur. Exemplum Doctor PERCIVAL MANCUNIENSIS, in suo tentamine Doctori HEIGARTHO dicato, enarravit; ubi vulnus, quod Tetanum effecit, adeo fuerat exiguum, adeoque ad sanitatem jam inclinaverat; ut aegrotus id prorsus neglectum habuisset: Et idem auctor censet, si neglectum quoque id habuerant medici, vel si, quibus Tetanus reverà indicetur signis, ignoraverant; hunc morbum, ob signa utriusque communia, pro Hydrophobia fuisse habitum potuisse. Hac autem versamur opinione, Tetanum, et Hydrophobia et aliis omnibus morbis accuratè dignosci posse; si idonea causae remotae ratio et cura, a medicinam facientibus, habeatur.

P R O G N O S I S.

In praefagiendo, optatus cuiquam morbo an malus fuerit exitus, signa, gravia sint an levia, animadvertendo ferè dirigimur: sed, qualis Tetano fuerit finis, prudentis est medici, nil, pro certo, praecinere. Adeo lethalis olim hic erat morbus, ut omnibus, qui in eum, infortunati, inciderunt, mortem ferè semper attulerit. Sed ratio ei obviàm eundi, quae, in utrisque INDIIS, melioribus avibus nuper invalere incepit, adeo feliciter, et ex medicorum sententia, saepe cessit; ut hi, eam sequendo, permultos Tetano afflictos, ad pristinam sanitatem, revocaverint.

Medicinam, iis in regionibus, facientes, qualis Tetano fuerit exitus, ex natura causae remotae, et ex observatis signis, praedicunt. Si enim hic morbus a laeso nervo incepit, ferè erit vehementior, quàm si incepisset a frigore, caeterisque rebus, quae vires infirment. Si signa subito prodeunt, brevè multò fiunt graviora; majus praesentiusque intentatur discrimen, quàm si incepissent mitia, et lentè invaluissent. Si, post medicamenta adhibita, signa non graveſcunt; si morbo

implicitus, cibum et appetit, et haud difficillimè glutire potest : Haec, spem ; contraria autem, metum ; medico injiciunt. Hic morbus saepe aegrotum, intra quartum diem, tollit : Si hunc evasit, ferè sine periculo est. Censet CULLENUS, quò diutius duraverit, eò minore in discrimine laborantem versari. Veruntamen observandum est, morbum, ultra quartum quidem diem, periculosum esse ; et saepe, ut in exemplo suprà memorato evenit, morte finiri. Decretorium diem nullum sui proprium habet ; sed primò tantùm paulò fit remissior ; et tum, propè ad sanitatem propiùsque inclinans, tandem decedit omnino.

RATIO MEDENDI.

Quò hunc morbum curemus, opus est ;

Primo, Ut remotas, tales si adhuc existant, causas tollamus ; dein,

Secundo, Ut spasmos solvamus, et usitatum corpori restituamus vigorem.

CONSILIUM PRIMUM.

Hoc consilium, ad remotas eas causas, quae, ad genus secundum suprà dictum, propriè pertinent, potissimùm respicit; quippe quae morbum et inducant, et, donec tollantur, inductum, nervos irritando, perpetuent.

Si laesus nervus morbum peperit, vulnus curâ quàm primùm explorandum est; quò, si aliquid sit extraneum nervum etiamnum irritans, id quàm citissimè tollatur. Post hoc, laesus nervus, ex transverso, incidendus est, vel parte, ubi laesus fuerit, vel hanc inter et cerebrum; ita ut laesae ~~ex~~ extremitati, cum cenforio communi, nullum postea confortium intercedat. Talis laesi nervi incisio, morbum etiamsi interdum non tollat, tamen, quippe cùm laboranti securitatem ferè polliceatur, nunquam negligenda est. Quibus factis, Thebaicam vulneri Tincturam admove, plurimùm, irritabilitatem hebetando, proderit; et, id ab externo aëri semper, quòd poterit, munire, perutile quoque invenietur.

Ad tollendos malos effectus, quos retentum meconium infantum edat, RUSHIUS censet; nil plùs


pollere, quantùm ex propria faltem experientia compertum id habuerit, quàm intestina lenibus medicamentis catharticis exinanire. Si venena aut vermes morbum effecerunt: Iis intestina, idoneis medicamentis adhibitis, quàm primùm vacuefacere, vel faltem eorum acrimoniam obtundere; hos, necatos aut vivos, expellere; medicos oportet.

CONSILIUM SECUNDUM.

Ad hoc efficiendum, quia multùm posse ea existimarunt medici, plurima laudata fuerunt remedia; quorum autem, longi ne simus, hic tantùm præcipua tangemus.

Balneum frigidum plurimùm, adversus Tetanum, pollere, multi, nostris temporibus, existimarunt. GIRDLESTON autem, ejus usum, ut periculofum, et interdum quidem lethalem, reprehendit; et, quò suam opinionem suffulciret, quaedam enarravit exempla Tetano laborantium, quos subita morte talis usus affecit. INDIAM ORIENTALEM, ait is auctor, advenit medicus; qui, cùm praejudicata esset opinione, balneum frigidum, plurimùm, ad Tetanum curandum, profecturum esse, multis hoc

morbo afflictis, in id ut descenderent, praecepit. Sed quàm aliter, ac ratus erat, evenit res. Quotquot enim immergendos curavit, iis adeo properavit mortis gradum, ut, vix adhuc balneo, trigesimam horae partem, sublati, animam omnes efflaverint.

Sed cùm a multis auctoribus, iisque haud parvi quidem nominis, ab HIPPOCRATIS tempore ad hunc usque diem, balneum frigidum, multùm, contra Tetanum, proficere sit existimatum; sumus idcirco adducti, ut, perniciosos effectus, ei a GIRDLESTONE assignatos, imprudenti potius incautoque id adhibendi modo, quàm remedio ipsi, attribuendos esse, crederemus: Eòque magis, quòd, per omne ferè  insulas INDIAE OCCIDENTALIS, caeterasque regiones ubi Tetanus frequentissimè saevit gravissimèque, hoc remedium invaluit; et, id, adhibitum, saepe optatos praestitisse effectus, complures praeclari exercitatusque testantur medici: Qui, nulla praejudicata opinione inducti, ejus multa summâ curâ ceperunt experimenta; et, computatione inita, se, plures Tetano implicitorum ad sanitatem, id prudenter adhibendo, revocasse, quàm alio ullo potuerant remedio, compererunt. Qui enim balneo frigido usi sunt aegroti, eorum parti dimidia, haud par-

vo, pro morbi gravitate, numero, pristina fanitas, ex toto, restituta est.

Aqua frigida corpus variè afficit, prout huic fit brevius, vel diutius admota. Quivis enim, firmissima quidem fruens valetudine, diu in aqua frigida si permanfit, horrore afficitur; et facies, unguis, et totum quidem corpus, livescunt. Sed, contra ea, si tantùm admodùm brevè in aqua fuit, aër circum ambiens, extremo corpori, jam aqua frigefacto, partem sui coloris impertiens, gratum a ibi salutiferumque excitat calorem, qui brevè totum corpus percurrit.

MOSELEIUS ait, in frigido balneo adhibendo, rationem, quali fit aeger corporis constitutione, aetateque, semper a medico habendam esse; sed, neque aetatem, neque corporis conditionem, quibus hoc remedium potissimùm conveniat, ipse exposuit; et satis habuit explicare, quo modo, Tetano cruciatis, qui ipsi curae fuerant, id adhibuerit. Quem ille secutus est modum, is ei, qui, in INDIA OCCIDENTALI, in usu est, prorsus ferè similis esse videtur.

Balneum frigidum admovendi modus, qui, in INDIA OCCIDENTALI, invaluit, etiamnumque in valet, hic est. Aegrotus, si prope flumen habitat

vel mare, in alterutrum subito mergitur; vel, si neutri est vicinus, egelida aqua, quantum contineat hydria, toti corpori affunditur. Si frigidior, quod, in calidis regionibus, interdum accidat, aquam facere velimus; nonnihil ei Salis Ammoniaci, vel Nitri, adjiciatur. Aegroto in aquammerso, vel ea peruso, extremum dein corpus ficcis mappis vel panniculis vehementer perfricatur; donec ubique ficescat calecatque. Lecto tum, in conclavi nimis nec calido nec incluso, imponitur, paucis vestimentis corpori injectis; et ei Opii dosis, quietem pariendi causa, adhibetur. Hoc consilio MOSELEIUS, Opio puro Tincturam Thebaicam, vino Antimoniali commistam, anteposuit. Interdum quoque, Tetano afflicto aquae, antliae tubo erumpenti, supposuit; quod, tribus quatuorve horis interjectis, integravit; adhibitis, per intervalla, medicamentis stimulantibus, vel spasmus solventibus, ut corpori calorem intenderet.

Opium aliud est medicamen, a quo auxilium, contra Tetanum, medici felicissime petiverunt. In hoc, quam aliis in morbis, largius, sine metu discriminis ex ejus usu venturi, assumi potest; quippe cum, ex largo ejus usu, aegrotus nil detrimenti unquam capiat.

Cùm perbrevis, postquam invasit Tetanus, glutire quàm fiat difficillimum; statim ideo, primo morbi accessu, hoc remedium largè adhibere medicos oportet. Si quando non satis maturè arcessitus sit medicus, vel si, etiam cùm satis maturè advenerit, non satis Opii priùs dederit, quàm glutire evaderit difficillimum; tum hoc medicamentum largis dosibus, idoneis intervallis intercedentibus, per anum in corpus immittendum est.

Opium, per os, in ventriculum assumatur, vel liquidum vel purum; sed hoc, utpote cujus effectus diuturniores sint, longè, ut nobis saltem videtur, illi anteferendum est. Verùm Doctor GIRDLESTON, spasticos INDIAE ORIENTALIS morbos tractans, ait; quàm ineptum sit adhibere purum opium Tetano laborantibus, non posse, quin perspicuum sit omnibus; qui, quàm impar usitatis muneribus stomachus, urgente hoc morbo, existat, animadvertant. De hac verò re, is auctor magno versari in errore idcirco videtur; quòd stomachus plerumque, dum urget Tetanus, res ingestas bene concoquere observatur; quod, vires concoquendi, ei quae sint propriae, parùm imminui satis ostendat. Praeterea, propria novimus experientia, Tincturam Thebaicam, hoc morbo, in INDIA VESPER-

TINA, laborantibus adhibitam, statim ejectam tam saepe esse ; ut, quid opium purum efficere posset, periclitari medici postea cogerentur. Hoc, quoties fuit, rebus ita sese habentibus, adhibitum, et ventriculo continebatur, et, quod optatum fuerat, efficiebat.

Extrinfecus quoque imponatur opium, forma cataplasmatum ; et exemplum Tetano laborantis, cui talis usus plurimum profuit, BLANUS enarravit *.

Remedia, alvum quae liquant, subinde, dum opium adhibetur, per anum injicienda sunt ; quò, aegrotus ne quid capiat detrimenti ex astricta alvo, quae, per totum hunc morbum, ferè adest.

Balneum Tepidum perdiu fuit remedium, quod plurimum, contra Tetanum, posse, medici crediderunt, quodque quidam etiamnum adhibere solent. Alii verò medici, balneum tepidum rejiciunt hoc nomine et aspernantur ; quòd aegrotorum, in id demissorum, quidam statim perierunt. Doctor CHALMERUS, lethalem hunc effectum non balneo ipsi, sed aegroto timenti, ne, aqua submersus, subito pereat, attribuit †. Etiam si verò conceden-

* Vid. Medical Observations, vol. II. Diseases of SOUTH CAROLINA.

† Vid. Treatise upon the diseases of Seamen.

dum fit, timorem, omnesque vehementes animi perturbationes, aegrotis, five Tetano five aliis morbis laborent, nonnihil discriminis afferre; tamen, quin calida remedia frequenter corpori ad-mota, multùm, iis in morbis, noceant, qui, velut Tetanus, vires tam citò labefactant franguntque, denegari non potest. Quam ob rem, balneum tepidum adeo, ut quibusdam videtur auctoribus, contra Tetanum valere, existimare non possumus; et speramus, brevì, balneo frigido, quod profectò quidem multò plùs potest, locum daturum.

Hydrargyrum quoque in auxilium, contra Tetanum, arcessitum fuit; et vix quidem minùs, quàm balneum frigidum, posse videtur. AIMAR hoc medicamentum, in Tetano, primus, adhibuit; existimans, quod reverà non esset, aegrotum morbo tum venereo laborare*. Falsa hac adductus opinione, ad hydrargyrum confugit; quod citò proritavit salivam, et, triduo, aegrotum omnibus Tetani signis liberavit. Sed, quòd hoc remedium in morbo, quem hìc tractamus, invaluit, potissimùm praeclaro medico, DONALDO MONRONI, tribuendum est†: Qui narrat, se, dum medicinam

* REVERII Observ. Communicat. X.

† Vid. Physical and Literary essays, vol. III.

in insula JAMAICA faciebat, saepe, per hoc medicamentum, Tetanum fugasse; postquam caetera omnia, quorum usus tum invaleret, incassum dederat. Recentiores quoque medici complures, propria experientia docti, MONRONI, hac de re, accedunt.

Modus hydrargyrum adhibendi optimus, est, sesquidrachmam unguenti, ex eo praeparati, extremo corpori, diversis in partibus, praesertim secundum spinam et cervicem, bis terve in dies, infricare. Eodem tempore, quo adhibeatur infrictio, grana pauca calomelanos manè assumatur et vespere; donec os internum affici incipiat, et saliva solito uberius moveatur. Simul atque hoc accidit, spasmi, et qui musculos, praeter modum, intendunt, et qui eos abnormiter convellunt et agitant, mitescunt et paulatim decedunt omnino. Spasmiss remittentibus, a calomelane abstinendum est; et, ut saliva, paucos per dies continuos, moveatur, unguenti ope efficiendum.

Plerisque eorum, quos hydrargyrum Tetano liberavit, os internum affectum est; etiam si, ut hoc fiat, medici interdum efficere non possint. Quoties res ita est, spasmi forsan totius corporis sunt adeo communes; ut vascula absorbentia laedan-

tur, et, eam ob rem, quò minùs argentum vivum in massam sanguinis forbeatur, obstitent. Debe-
musne igitur, cum res ita sese habet, sed praefer-
tim cum adest Trismus, praeter unguentum, gin-
givis et interioribus buccis pauxillum calomela-
nos infricare? Talis usus interdum, medicorum
voto, salivam proritando, cedere potest; et cele-
berrimus HOMIUS, hydrargyrum in corpus saepe,
hoc modo, immisit*.

Hydrargyrum Vitriolatum vulgò *Turpethum Minerale*, cum unguento, extrinsecus admoto, quò
salivam hoc citiùs proritaret, haud sine utilitate
mistum fuit. Doctòr MONRO exempla duo me-
morata habuit, in quibus hydrargyrum fuit, hoc
modo, felicissimè adhibitum.

Camphora quoque, ea inter medicamenta, quae
Tetano implicitis multùm proficiunt, meritò enu-
meratur. Auctores multa memorant exempla ho-
minum hoc morbo, in INDIA OCCIDENTALI, labo-
rantium, quibus camphora permultum leniminis
commodique attulit. Plurimùm prodest, opio con-
juncta, et largis dosibus adhibita.

Moschus etiam saepe in auxilium, contra Teta-
num, fuit arcessitus. HILLAREIUS autem censet,

* EDINBURGI Mater. Medic. Professor.

multò plus prodesse, unà cum opio adhibitus si fuerit, quàm alterutrum horum medicaminum prodesset per se *. Sed cùm, in curando hoc morbo, haec remedia semper, credimus, conjuncta adhibeantur; quantùm, auxiliis nullis, moschus propriis viribus possit, discernere et aestimare non possumus.

Aether Vitriolicus, multùm, ad spasmos solvendos, ideoque ad Tetanum curandum, conferre putatur. Non defunt, qui, opio quidem, multisque aliis remediis, eum anteponunt; eò quòd nulla torpidum corpus faciendi facultate pollet. Mihi quidem ipsi, nulla, hujus medicamenti utilitatem periclitatione percipiendi, occasio oblata est: Sed nonnulli medici, imprimis GILPINUS GRANATENSIS, se, optato cum effectu, adhibuisse ferunt; idque summis itaque laudibus onerant.

Corticem Peruvianum et *Vinum* in laudando, multus est RUSHIUS; utpote quae, post opium frustra adhibitum, permultum Tetano laborantibus levaminis attulerint †. In INDIA ORIENTALI, vinum, ab insula MADERA cognominatum, hoc morbo implicatis porrigitur; et Doctor CURREIUS LIVERFOLI-

* Vid. Diseases of BARBADOES.

† Vid. AMERIC. Philosoph. Transact.

ENSIS memorat, se semel vidisse Tetanum multo hujus vini usu omnino tolli.

Quod ad *Missiōem Sanguinis* attinet, non defunt exempla, in quibus, interdum multum profecisse, fatis apparet. PUOLIUS refert, puellulam Tetano affictam, sanguinis detractiōe prorsus curatam esse *. FORRESTUS memoratum quoque habet exemplum; ubi, etsi Tetanus, quinque dies, perstitisset, neque fuisset ullis medicamentis levatus, tamen omnia signa, sanguine misso, paulatim decesserunt. Idem est auctor, in Tetani exemplo, quod Synocha comitabatur, sanguinis detractiōem plurimum profuisse. Sed pauca haec exempla, in quibus missus sanguis ad spem medici respondit, minimè fatis afferunt rationis, cur semper ad tale remedium, Tetano urgente, confugeremus: Eòque magis, cum sagax CULLENUS notaverit †, sanguinis, hoc morbo praesente, missi particulas, minùs firmiter, quàm naturaliter oportet, inter se cohaerere; aequè ac, in Typho, accidit, caeterisque in morbis, qui, ex corpore magnopere debilitato, pendent. Sanguis igitur tum solùm, nobis opinantibus, mit-

* Vid. *Journale de Medicine*, tom. xxvi. pag. 225.

† Vid. *First Lines*. vol. iii.

tendus est, cùm aegrotus sit admodum plenus, vel cùm febris ardens Tetanum comitetur.

Fluidum Electricum in plerisque morbis, qui, ad spasticum genus, propriè pertinent, adhiberi nuper incepit. Hujus remedii ope, eruditus DE HAENUS, Choream ‡ sancti VITI; et LINDAULTIUS, Epilepsiam §; curaverunt. Sed, quod rei nostrae plùs interest, WATSON, hoc medicamento admoto, post caetera sine fructu tentata, puellae, totum cui corpus Tetano vexabatur, pristinam sanitatem restituit *. Quin et, eodem medicamento SPREIUS, adolescentulam et Trismo, et Paralyfi inferioris dextri membri, quibus utrisque eodem laborabat tempore, prorsus liberavit †. Doctor DUNCANUS ¶ itidem, in multis exemplis, quibus, cum modo dicto, magna erat similitudo, optimos ex ejus usu fructus percepit. Peritus idem medicus contendit, hoc remedium non minùs, ad nimiam morbidamque sensilitatem hebetandam, posse, quàm ad sensum corporis, praeter naturam, torpidi resuscitandum. His rebus itaque cognitis, hoc remedium

‡ Vid. Ration. Medend.

§ Vid. Medical Commentaries.

* Vid. Philosoph. Transact. vol. liii.

† Vid. Philosoph. Transact. vol. lvii.

¶ Medicin. Theoret. Edin. Prof.

multò plùs Tetano laborantibus proficere, quàm medicorum plerique existimarunt; ideoque ad ejus usum saepiùs decurrere eos oportere; inclinant animi, ut arbitremur.

Pissellaeon Barbadiense quid, contra Tetanum, efficere possit, cùm id nunquam viderim adhiberi, nil, ex propria experientia, dicere possum.

Sinapismos, denique, et *Vesicatoria*, non modò, urgente hoc morbo, non prodesse, sed, corpus irritando, plurimùm quidem nocere, multorum propria medicorum experientia fatis nobis affert rationis, cur crederemus.

FINIS.

